

卷一

壬申之春清明後一日荷蒙

汪鶴齡姍世丈大人持贈

廖方浦集詩話時名津門

青學齋集

王壹

青
學
齋

鑾

年家子胡玉縉
敬題



辛未夏

新陽汪

氏青學

齋栞成

敘



光緒戊子貴筑黃子壽先生開藩吳中勅設學古堂於
郡城可園檄玉縉及章式之爲齋長時學長聘世丈雷
深之先生繼之者年丈汪振民先生業師袁環瑀先生
也雷先生說文外編等及身早刊其睡餘偶筆道福堂
詩集哲孫聽思亦刊黃先生陶樓文鈔由縉編次同人
醵貲付刊袁先生寄蛄廬集亦縉編次世兄藻樓方謀
刊而未竣者也一日汪鶴舫同年齋尊甫振民先生
青學齋集原藁及謄本屬爲編校中有先生自定本三
冊尙少譌字餘須一一將藁對勘而其藁蠅頭細字涂

改鈎乙不易辨識間有舛誤並蟲蝕凡所援引須檢閱
原書未容草率重以他務不免作輟如是者有年茲幸
編次已竟計改正謄本數百處校正原藁數十事爰爲
之敘曰新陽者本崑山縣西境雍正二年析置者也崑
山顧亭林先生卓然爲大師新陽如張无躁潘確潛輩
亦頗掣究經史及說文音韵之學而名不著先生世居
郡城惠元龍父子及孫江良庭祖孫褚摺升余古農宋于庭沈文起諸老遺風
尙有存者桃被所暨故其學在張潘後爲傑出集中如
以湯誓序爲有錯簡聖人爲之長長字爲用少儀兩穎
字一爲枕篋一爲刀櫝不從鄭義季蘭爲邑姜名力申

何說泰卷陶陶字當連下中囁作詰讀不必爲衍文離
騷取法於易不必爲詩經別子之類縉竊未敢苟同而
以同人彖詞之曰同人曰字爲釋卦名同人曰曰字爲
釋卦詞例之以大有解兩彖傳足見同人曰三字之非
衍以鄭解六宗爲申伏傳伏生非天不生云云非徑以
天地四時當六宗意亦謂天神足補謝王諸家所未逮
以雲土夢之土爲卽徒洲土與徒通猶漢志雲杜縣史
記索隱引漢書音義作雲土土本不讀如字而雲土夢
雲夢土之本皆可通以洛有二源伊雒作雒爲洛之段
字證之袁良碑河洛說文翬雒二篆注一作伊雒一作

伊洛而伊雒字古不作洛之說爲紕以伊陟原命爲再
命原非臣名伊陟二字爲誤增而史記伊陟讓之語得
此益明以韓城爲古無兩韓國因徙封而有兩韓城與
鄭封咸林遷溱洧楚封丹陽遷郢正同而河東河北縣
有韓城涿郡方城縣有韓城之說初非違鑿以肆師注
匪其筐之誤與毛本筐作筐爲是儀禮禮記筐筐之筐
多作筐而周禮匪頒匪邑均作匪鄭恐讀者誤認匪籜
與彼匪字溷淆特言此以別之而鄭君欲破筐從筐之
說實失鄭意以宗其繼別子之所自出者爲卽指別子
非上及別子之所自出注言繼別子明以繼別子三字


連文爲義足正朱子以之所自出四字爲衍之妄以辨
志爲仍指所離之經言與離經對文辨屬學者非屬考
校者於記意極合於鄭義亦不背以楚莊引詩爲依樂
章次第非楚樂次第引儀禮合樂及歌鄉樂各詩爲證
僅去注文一楚字而義乃大通以多隨二創爲多從公
穀二家與何休傳云難二傳義正相反深得解詁序之
旨非苟爲立異以顏讐由爲顏濁鄒非顏涿聚其顏涿
聚則爲顏燭離或作燭趨非濁鄒語極分曉足解史記
索隱正義之糾紛以史遷尊孔孟爲昭功令非寓特筆
以孟荀列傳爲重在經術荀子有功諸經亞於孟子竝

屬讀書得間彼盛稱史遷推尊之意及辨明荀子性惡之說者猶淺以李斯學帝王之術爲漢帝王所學之術正與之同史公因以稱之以班固議史遷先黃老諸語爲在遷爲紀實在固爲身親論其文莫非論其世尤能揭發隱微彼曲護李斯及議班氏之誣遷者轉爲多事以趙廣漢善鉤距爲卽申韓之術以漢書無世家爲本班彪後傳厯引韓非諸文及後漢書彪傳皆塙有根據發前人所未發以范書譏賈逵埒會圖讖致貴顯爲誣以韓愈爲河陽人一據張衡傳及隋經籍志一據韓昶墓誌而史文矛盾之處乃有定說以漢學商兌爲妄度

君子之心與以詩疑歸獄於朱子之廢序同一持論之
嚴以老子之學爲絕異黃帝之所爲與以釋老之非在
竊聖賢之似而掩其爲異端同一衛道之切他如棠邑
等攷見地理之摯求釋元諸篇見小學之貫澈史論務
案諸本事不以翻空爲奇時事務策其可行不以高談
爲貴駢文則不取繁縟而吐屬神似齊梁詩篇則不尙
雕剗而氣體出入唐宋洵所謂攷據詞章兼擅其勝者
矣往者游汪氏耕蔭義莊見廳事東偏壘石爲山子然
一拳躋其上如在千巖萬壑中相傳係戈裕良所造自
負軼於獅子林蓋獅林占地多而以繚曲勝此山占地

少而以隱秀勝先生文無一冗長大都言簡意賅蔚然
深秀殆有悟於戈氏之爲藝使先生有知倘亦覲然而
笑曰孺子可教乎學古堂月課日記同人例稱學長爲
師縉不作日記於雷先生仍舊稱汪先生如之且例師
之泛孰與年丈之親要其品優學粹經師人師表率同
堂綽有餘裕奚翅玉縉已也已巳重九日年家子吳縣
胡玉縉謹敘於北平之鯤高時年七十有一

振民先生像



孫男希董謹摹
後學孔昭晉題

其心蠲絜其兒清懼其學
精密其文勇映寔事求是
兮兀然為乾嘉後之名儒

年家子胡玉縉謹贊



新陽汪先生墓表

吾吳經學大師大都分隸負郭三邑世居會垣別以新陽著籍則爲前學古堂學長汪先生先生諱之昌字振民先世自歙遷吳五世祖捐建崑山文廟奉旨入籍新陽爲崑山分縣後人皆以新陽應試故先生仍之先生入學後一充同治丁卯補行辛酉科副貢遂謝舉業以閉戶讀書爲事鉅列門籍有年竊嘗聞先生爲學大概矣先生始本庭訓謂攷訂古書可自驗識力並可備後人取資嘗命先讀遼金元三史以period用心入細後遂專研經義以說文爲輔旁及諸史諸子與夫輿地目錄九

章家言行文則徑學史漢不屑以八家入手家本素封
遭亂少替楹書連屋亦灰滅無遺當道聞先生好博覽
延入書局校理又分應正誼書院經古月課并上海求
志甯波辨志江陰南菁諸文課膏獎所獲悉以購書屏
棄百事寢饋其中故凡所造述靡不貫穿本末平決異
同鈎隱以達顯舉大以賅細金壇段氏序潛擘堂集有
曰其理明其氣和其書味深者庶幾近之每歲七月初
五日漢高密鄭公誕辰必瓣香行禮記以詩文則先生
私淑之微旨也中年以後伏案勤劬時患氣疾然亦未
嘗輟業風雪午夜則撫所愛狸奴歛襟展卷漏三四下

家人尙聞啟櫃檢書聲甚或際曉乃息光緒辛卯鄧公
華熙任蘇藩聘主學古堂講席因才指授學者誠服平
生篤於本原之地門內外族長幼無閒言嘗一起歛中
故山循視先壟祭埽加虔待人則以和爲主鑄一和字
小印佩之示不忘先訓也生道光十七年八月戊申卒
光緒二十一年六月壬辰年五十有九著有青學齋集
三十六卷裕後錄二卷曾祖諱爲仁祖諱詒德考諱塹
世有令德并拜崇封配夫人何氏恭儉慈祥肩家政者
數十年先生之不問生產一意爲學則夫人之助也子
開祉辛卯科舉人前官江南通州學正厯保直隸補用

道女三適潘適潘適祝孫三希董希田希范曾孫三樹
模樹滋樹津嗚呼先生之逝三十餘年矣經師人師之
望今則誰克當之聞之咸同以來陳培之部郎倬丁泳
之孝廉士涵與先師雷深之先生浚均以通經學古有
吳下三三之譽先生固揖讓其間而知者或鮮矣遺書
晚出津逮宏多敬述大要以諗夫攷吾吳惠氏江氏以
後之學派者歲在辛未八月受業長洲章鈺謹表